

# সূত্র

প্রিন্ট: ১০ ডিসেম্বর ২০২৫, ১২:০৬ পিএম

সারাদেশ

## রাবির এক আসনের বিপরীতে লড়বেন ৬৮ ভর্তিছু



রাজশাহী ব্যুরো

প্রকাশ: ০৯ ডিসেম্বর ২০২৫, ০৭:৩৭ পিএম



রাজশাহী বিশ্ববিদ্যালয়ের ২০২৫-২৬ শিক্ষাবর্ষের স্নাতক প্রথম বর্ষের (সম্মান) ভর্তি পরীক্ষার আবেদন প্রক্রিয়া শেষ হয়েছে সোমবার। এ বছরের ভর্তিযুদ্ধে তিনটি ইউনিটে মোট আবেদন জমা পড়েছে ২ লাখ ৭২ হাজার ৬২৫টি। বিশ্ববিদ্যালয়টিতে মোট আসন সংখ্যা ৩ হাজার ৯৯৭টি, ফলে একটি আসনের বিপরীতে লড়বে ৬৮ জন ভর্তিচ্ছু।

মঙ্গলবার (৯ ডিসেম্বর) সকালে তথ্যটি নিশ্চিত করেছেন বিশ্ববিদ্যালয়ের আইসিটি সেন্টারের পরিচালক অধ্যাপক মো. ছাইফুল ইসলাম। তিনি বলেন, গত ২০ নভেম্বর বেলা ১২টা থেকে রাবি ভর্তি পরীক্ষার আবেদন শুরু হয়। আবেদন গ্রহণ করা হয়েছে ৭ ডিসেম্বর রাত ১১টা ৫৯ মিনিট পর্যন্ত। এ বছরের আবেদন প্রক্রিয়া সম্পন্ন হয়েছে।

চলতি বছরে তিনটি ইউনিটে মোট ২ লাখ ৭২ হাজার ৬২৫টি আবেদন জমা পড়েছে। এর মধ্যে ‘এ’ ইউনিটে ১ লাখ ১১ হাজার ৫১৪ জন আবেদন করেছেন, যেখানে ১ হাজার ৮৯৭টি আসনের বিপরীতে প্রতিযোগিতা করছেন প্রায় ৫৯ জন পরীক্ষার্থী। ‘বি’ ইউনিটে আবেদন পড়েছে ৩০ হাজার ৮৮৬টি। এখানে মোট ৫৬৪টি আসনের বিপরীতে প্রতিযোগী সংখ্যা দাঁড়িয়েছে প্রায় ৫৫ জন। শাখাভিত্তিক হিসেবে বাণিজ্য শাখায় প্রতি আসনে লড়ছেন প্রায় ৪৯ জন এবং অ-বাণিজ্য শাখায় প্রায় ৬৬ জন।

অন্যদিকে ‘সি’ ইউনিটে মোট আবেদন এসেছে ১ লাখ ২৬ হাজার ২২৫টি। এই ইউনিটের ১ হাজার ৫৩৬টি আসনের বিপরীতে প্রতিযোগিতা করছেন প্রায় ৮২ জন। শাখাভিত্তিক হিসাব অনুযায়ী বিজ্ঞান শাখায় প্রতি আসনে প্রতিযোগী প্রায় ৮১ জন এবং অ-বিজ্ঞান শাখায় প্রতি আসনে লড়ছেন প্রায় ১৩৫ জন পরীক্ষার্থী।

উল্লেখ্য, এবারের ভর্তি পরীক্ষা ‘সি’ ইউনিট (বিজ্ঞান) দিয়ে শুরু হবে। ১৬ জানুয়ারি ‘সি’ ইউনিট (বিজ্ঞান), ১৭ জানুয়ারি ‘এ’ ইউনিট (মানবিক) এবং ২৪ জানুয়ারি ‘বি’ ইউনিটের (বাণিজ্য) ভর্তি পরীক্ষা অনুষ্ঠিত হবে।

এ বছরে সিলেকশন থাকবে না। দুই শিফটে পরীক্ষা নেওয়া হবে। প্রথম শিফটের পরীক্ষা বেলা ১১টা থেকে ১২টা এবং দ্বিতীয় শিফটের পরীক্ষা বিকাল ৩টা থেকে ৪টায় অনুষ্ঠিত হবে।

এছাড়া এবারের ভর্তি পরীক্ষা রাজশাহী, ঢাকা, চট্টগ্রাম, খুলনা ও রংপুর ও বরিশাল বিভাগে অবস্থিত পাবলিক বিশ্ববিদ্যালয়সমূহের ক্যাম্পাসে অনুষ্ঠিত হবে।